

TENTASHON

Lès 2

Hopi hende ta keda strañá ku nan ta tentá pa hasi malu despues di aseptá Kristo komo Salvador. No keda strañá. Tentashon **lo** bin. Kisas bo a yega di puntra bo mes, “Dios tin tur poder. Pakiko anto E no ta preveníbo di ser tentá hamas despues ku bo aseptá Kristo?” Un persona a opservá korektamente, “Tentashon ta mes nesario pa produsí kristiannan fuerte ku ehersisio ta pa un atleta.” Méskos ku ehersisio ta desaroyá e múskulonan i ta hasi e atleta mas fuerte, igualmente viktoria riba tentashon lo ponébo krese i preparábo pa enfrentá pruebanan mas pisá den futuro. Pues, Dios ta pèmití tentashon bin den bo bida pa hasíbo spiritualmente fuerte.

DI UNDA TENTASHON TA BIN?

Tentashon por bin di tres diferente fuente:

1. Un fuente di tentashon segun Santiago 4:7 ta _____.
E ta hopi rabiá ku bo a entregá bo bida na Kristo. Awor su meta ta pa tentábo di tal sistema ku bo ta hasi piká. E ke destruí bo bida spiritual. Bo tin ku resistí kontra dj’e.
2. Tentashon tambe ta bin di e sistema di bida mundano (1 Juan 2:15-17). Hende ta pone preshon riba e kristian pa ta méskos ku nan. Bo por haña e preshon ei di famianan, amigunan, koleganan, radio, televishon, revista, èts. Awor ku bo a aseptá Kristo, bo no mester someté na e preshon pa partisipá den nan piká.
3. Un otro fuente di tentashon segun Santiago 1:14 ta _____

Un yu di Dios tin dos naturalesa: esun **bieu** ku ta produsí piká so i esun **nobo** ku tin Spiritu Santu komo sentro i ku ta produsí lokual ta agradá Dios. Beibel tambe ta yama un e naturalesa “karnal” i e otro e naturalesa “spiritual”. Galatio-

nan 5:16-22 ta deskribí e bataya kontinuo ku bo mester hiba kontra e “karni” i loke tantu karni komo spiritu ta produsí. For di e naturalesa karnal ketu bai ideanan, eksperensianan, aktonan, pensamentunan ta bin den bo mente i ta lamta deseo den bo pa hasi e kosnan ku nan ta surgerí. Esaki riba su mes no ta piká. Bo no por evitá ku siertu pensamentu (èts.) ta pasa den bo mente, pero sí bo por rechasá nan i nenga sigui pensa den e direkshon ei. Bo por nenga pèrmiti e deseo di tin un gara riba bo. Tin un dicho, “Bo no por stroba paranan di bula riba bo kabes, pero bo por stroba nan di traha neishi den bo kabei!”

Segun Santiago 1:14-15, ki ora tentashon ta bira piká? _____

Ora bo ta haña un pensamentu pa hasi, papia, òf pensa malu, esei ta e tentashon. E ora ei bo tin ku hasi un desishon. Talbes e desishon ta inkonsiente pa kuminsá, ma ku tempu Dios lo hasíbo konsiente di dje. Si bo ta bisa “sí” na e deseo malu (ta entregá pa hasi, papia, òf sigui pensa malu), bo ta hasi piká. Ma si bo ta bisa “nò” na e pensamentu malu (ta rechasá i resistí kontra e deseo malu), bo no ta hasi piká. Pues, bo ta hasi piká ora bo ta entregá na e deseo malu (sea den pensamentu, aktitut, palabra, òf akshon).

PREPARA PA E BATAYA

Si bo entregá na tentashon, bo kontakto ku Dios ta kibra (Isaias 59:2), bo ta pèrdè pas i alegria den bo bida, bo bida spiritual lo ta derotá. Bo no ke pa esei sosodé. P’esei bo mester prepará adelantá pa e bataya.

Un manera efektivu pa prepará ta dor di yena bo mente ku tekstonan di Palabra di Dios ku ta papia spesífikamente tokante e piká òf tentashon ku bo ta batayá (Salmo 119:9,11). Anto ora bo ta ser tentá, Spiritu Santu lo kòrdábo di e tekstonan apropiá ku bo a memorisá. Esei ta presis loke Hesus a hasi tres bes ora Satanas a tent’E (Mateo 4:1-11), usando tekstonan spesífiko ku El a siña fo’i kabes. Ma Spiritu Santu no por kòrdábo di Skritura si bo mes no ta hasi esfuerso pa les’é òf memoris’é.

VIKTORIA TA PUSIBEL

Tin bes e tentashon por ta hopi pisá. Talbes bo ta pensa ku bo no por resistí mas. Ma Dios ta garantisá viktoria den 1 Korintionan 10:13. Kiko Dios ta bisa tokante tentashon den e teksto aki?

	SI	NO
Tentashon ta un kos normal		
Dios ta prevení un kristian pa wòrdu tentá		
Dios ta lubidábo den bo lucha kontra piká		
Dios sa presis kuantu bo por wanta, i ta midi kada tentashon nèt pa bo		
Bo por ekspresíá tentashon ku ta mas fuerte ku bo por suportá		
Dios lo sòru ku tin manera pa skapa		

Segun e teksto aki, bo tin ku pasa **dor** di e tentashon, bo tin ku **soport'é**. Ma tin bes bo por hasi algu adishonal.

YUDANSA PRAKTIKO

Kiko ta algun kos ku bo por hasi pa evitá di kai?

- ✓ Kiko 1Korintionan 6:18 ta bisa ku bo mester hasi?_____
- ✓ Evitá di bai lugánan kamina e tentashon lo ta sigur.
- ✓ Tin bes bo tin ku separábo di amigunan ku ke hinkábo bèk den bo bida bieu.
- ✓ Stòp di yena bo sintí ku pensamentu kontrario di Palabra di Dios. Selektá ku kuidou programa di radio, pelikula, òf revista. No invertí bo tempu si tin indikashon immoral.
- ✓ Sea fiel na bo tempu di deboshon personal i asistí fiel na sirbishinan. Esakinan lo yuda duna forsa diario den bo bataya kontra piká.

KIKO SI BO TA KAI?

Dios a hasié pusíbel ku bo no mester kai pa tentashon. Ma kiko bo mester hasi si bo ta fracasá? Dios a hasi provishon pa esun ku ta repintí despues di trompiká. Segun 1 Juan 1:9:

Kiko bo mester hasi ora bo hasi piká? _____

Kiko ta Dios Su promesa? _____

Segun Proverbionan 24:16, ken ta kai? _____

Despues ku el a kai, kiko e ta hasi? _____

Ora bo ta kai, no desanimá. Kisas bo ta kòrda ora bo a siña kore baiskel. Bo a kai raska kurpa vários biaha. Kiko lo a sosodé si bo disidí ku ta muchu difísil, ku bo no ta sigui kastigá bo kurpa asina? Nunka lo bo a siña kore baiskel. Ma echu ta, bo a kai, lamta, bolbe kai, i bolbe purba, te porfin bo por kore baiskel bon. Promé ku bo a aseptá Kristo, bo a kustrumbrá di hasi siertu kos, reakshoná siertu manera, papia siertu palabra. Ma awor bo tin ku siña biba un otro manera. Bo tin ku stòp di hasi malu, papia malu, i pensa malu i remplasá esei ku loke Dios ta deseá. Ma esei no ta fásil. Ta difísil pa kibra hábitonan malu i remplasá nan ku hábitonan bon. Konsekuentemente bo ta kai. Ma no desanimá! Sikólogonan ta bisa ku ta dura por lo ménos seis siman pa siña un hábito nobo. Dios lo dunábo forsa pa lamta i purba atrobe, te porfin dia ta yega ku ta bira un hábito pa bo hasi loke ta bon!

TAREA PA KAS

1. Otro biaha, bin ku un ehèmpel di tentashon ku bo a eksprensíá despues di e lès aki i kon bo a trata kun'é.
2. Siña 1 Korintionan 10:13 fo'i kabes.
3. Promé ku e siguiente lès, konta un persona ku bo a aseptá Kristo komo bo Salvador personal.
4. Tuma sikiera 15 minüt pa Dios tur dia den Beibel i orashon.
5. Lesa e siguiente lès, yena e kontestanan, i kuminsá skirbi bo tèstimonio personal segun e guianan presentá den e lès.